

新元史

第三册



列傳第五

新元史卷之一百八

賜進士出身日講起居注官翰林院侍讀國史館纂修膠州柯劭忞撰

太祖諸子三

拖雷上

旭烈兀
阿八哈

出伯
台古塔兒

拖雷太祖第四子也甫能言太祖爲泰亦赤兀人所虜額訶倫太后及家人皆謂不能免拖雷獨曰我父乘栗色馬歸矣咸以爲妄語翼日太祖果至乘鎖兒罕失刺所贈之栗色馬眾始奇之稍長英武有幹畧太祖親征常攜以自隨呼爲那闊兒譯言伴當也太祖七年攻金德興府不克使拖雷與駙馬赤苦帥師再往先登毀其

樓櫓拔之八年從太祖攻雄霸莫河間滄獻深祁蠡冀恩濮開滑博濟泰安濟南濱棣益都淄濰登萊沂諸州路皆望風款服十四年從伐貨勒自彌別將一軍渡阿母河略定呼拉商部事具西域傳二十年太祖分封諸子拖雷分斡難河上源及合剌和林之地太祖四大斡兒朵所在也其後皇孫闊出等來求賞太祖曰吾產業已盡與拖雷彼家主也可向拖雷索之國俗少子守父遺產故太祖獨以舊居之地與拖雷云二十二年太祖崩於靈州諸皇子奉梓宮北還葬畢各歸本部拖雷監國以待立君又明年春召集忽里勒塔譯言大會議也

國俗承大位者必經忽里勒塔之議定太宗雖有太祖之前命猶遵國俗召諸王駙馬及諸大將會議衆議多擁戴拖雷太宗亦固辭於是猶豫不決者四十餘日已而斡赤斤與察合台決計遵太祖前命乃扶太宗卽位拖雷進酒諸王駙馬諸大將脫帽九頓首稱可汗萬歲者三太宗自御帳出先拜日而後受賀焉二年太宗伐金拖雷帥子蒙哥及諸王阿勒赤台口溫不花等各以所部兵從行渡漠至官山遂入河東拔韓城蒲城金大將合達布哈守鳳翔進攻之前軍戰不利明年二月克鳳翔五月從太宗避暑官山集諸王大將議伐金之策

先是有降人李國昌言於拖雷金人遷汴二十年恃黃河潼關爲固若出寶雞道漢中不一月可抵唐鄧金人失險首尾不相顧我取之如探囊底物矣拖雷然其計及是以聞太宗從之遂定議三道進兵期以明年春會汴先遣搠不罕如宋假道至青野原爲宋將張宣所殺時拖雷已將右軍由鳳翔渡渭過寶雞入小潼關欲沿漢水而下聞宋殺使人大怒遂總三萬騎入大散關破鳳州徑趨華陽出武休關圍興元府屠洋州分一軍由沔西取大安軍撤屋爲筏渡嘉陵江入八關堡取葭萌略地至西水縣破城寨百四十而還十一月至興元洋

州間與東軍合進至饒風關遂取金房二州破宋兵於武當山趨均州十二月戊辰由峭石灘浮騎渡漢水而北遣夔曲涅帥千騎馳白行在太宗方欲渡河分兵南應拖雷會夔曲涅至卽日使返報約南北會師拖雷旣渡漢謀知合達布哈步騎十五萬據鄧州西之禹山以待拖雷總七提控兵凡三萬騎金兵四倍之惟步多騎少拖雷悉留輜重輕騎以進丙子日未出次禹山見金步騎傳山前後陣因命我軍分布如雁翅轉山麓出敵陣之後以銳騎突之金人不得不戰至以短兵相接我軍少卻別將在西者望見布哈躬擐甲騎而督陣亦自

陣後襲之金將蒲察定住力戰爲所卻遂退匿光化對岸棗林中晝作食夜騎以待遣諜十人敝衣羸馬亡入金師泣愬飢寒金人信之與之酒食置陣後十人乘間逃歸盡得敵之虛實庚辰金大兵過林後我軍突出攻之敵棄輜重走不復成列我軍夜追之比至鄧敵已入城圍之三日不下相持至歲除四年正月壬午朔金人耀兵城外拖雷不與戰集諸將議以頓兵堅城下非計明日悉率大軍踰鄧而北命札刺兒將三千騎殿合達等慮我軍直襲汴京亦棄鄧躡我軍之後甲午我軍次五朵山明日曉行大霧失道金人以萬騎抄我軍札刺

兒戰失利多所折傷拖雷怒其失律以額勒只吉歹代之我軍駐沙河北命失吉忽都虎以五千騎誘敵敵奪橋而進我軍不與戰南渡沙河敵欲安營我軍復渡河襲之金人不得食宿明日雨雪拖雷自以萬騎尾敵後且戰且行至黃榆店距鈞州二十五里雨雪不能進兩軍對壘相持拖雷命終夜鼓譟以擾之丙申雪益甚時太宗已由白坡濟河先遣諸王口溫不花等帥萬騎來會伐大樹塞敵前路會合達等得金主密諭言北騎已過懷孟促入援丁酉雪不止金將楊沃衍拔樹開道完顏彝率所部爲前鋒至三峰山彝先據山上武仙高英

軍於山西南樊澤楊沃衍軍於東北拖雷欲擊之諸將請俟車駕至破之未晚拖雷曰機不可失脫彼入城未易圖也況大敵當前敢以遺君父乎乃佯卻以誘之金將按忒木張惠見我軍勢卻卽揮兵乘高而下我軍回拒之須臾雪大作白霧彌天人不相覲戰地多麻田往往耕四五過積雪盈尺人馬所踐泥淖沒脛金軍中有三日不食者被甲冑僵立雪中槍槩凍結如椎拖雷合南北兩軍圍之數重令軍士番休析薪蘩火割牛羊肉炙而啖之久之料敵憊故開鈞州路縱之走伏軍於前路夾擊之金師大潰聲如山崩天忽開霽日光皎然金

之精銳盡爲我軍所殺合達彝沃衍以數百騎走入鈞州布哈走汴至望京橋就獲明日車駕至按行戰地顧謂拖雷曰微汝不能破敵神速如此拖雷遜謝而已聞者服其不伐從拔鈞州獲合達彝殺之尋從拔許州遂圍汴夏四月扈駕北還避暑官山五月太宗不豫暴瘖六月疾甚師巫言金國山川神以我殺戮過多爲祟非犧牲所能禳惟子弟可以代之拖雷乃禱於天請以身代取釁菽之水而自飲焉數日太宗疾果瘳拖雷從還漠北行至阿剌合的思而卒年四十憲宗卽位追上尊號諡曰英武皇帝廟號睿宗至元二年改諡景襄皇帝

至大二年加諡仁聖景襄皇帝子十一人長憲宗次忽都禿世祖旭烈兀阿里不哥不者克末哥歲哥都雪別台二子失名

史臣曰周公金縢之事三代以後能繼之者惟拖雷一人太宗愈而拖雷竟卒或爲事之適然然孝弟之至可以感動鬼神無疑也世俗淺薄者乃疑其誣妄過矣

旭烈兀拖雷第六子也少世祖二歲太宗二年旭烈兀伐宋拔安豐賜河中陝西諸路爲分地憲宗卽位使旭烈兀開藩西域一切承制專決授爲葉爾堪西域之制汗曰阿塔畢次汗位一等則爲葉爾堪初定宗中分西

域之地以額勒知吉歹管角兒只領西域之西半境阿兒渾管呼拉商領西域之東半境憲宗又分西域爲四部曰呼拉商馬三德蘭義拉克阿耳佩占皆統於旭烈兀憲宗二年以木剌夷凶悍無道命旭烈兀率諸將討之乃蠻人寶兒赤怯的不花有勇畧率萬二千人爲前鋒三年怯的不花攻木剌夷吉兒都苦堡地勢險峻堅守不下是年憲宗又命大將撒里等征印度亦聽命於旭烈兀撒里等入克什米爾涉印度斯單界大掠而還旭烈兀以怯的不花師老無功乃決計親征是時西域統兵大將爲綽兒馬罕貝住分駐於克什米耳者爲岱

兒巴圖三將皆受旭烈兀節制未幾岱兒巴圖卒以撒里代之太祖諸孫所部之兵十僉其二從旭烈兀討木剌夷旭烈兀命貝住先至羅馬修橋道峙糧儲憲宗諭旭烈兀木剌夷平後卽入伊拉克羅耳庫兒特諸部以刼蒙古商旅也報達如來修好勿拒絕否則移兵伐之凡大兵所過之地勿擾民以廣招徠軍事與杜庫司哈敦同議聽其區畫憲宗意俟諸部平盡畀旭烈兀爲封地然未明言也皇弟雪別台幼亦從行是年旭烈兀自和林返西域四年率諸將出師杜庫司哈敦以第二子台古塔兒從察闊台孫也速蒙哥妃倭耳干納來犒師

免大兵所過之地今年租賦五年駐兵撒馬兒干其長
官馬素特獻金織紋幹爾朵未幾皇弟雪別台卒烏魯
克射姆思哀丁先上謁旭烈兀優禮之至渴石阿兒哀
亦率所部來迎旭烈兀分遣使者諭各屬國令出兵討
木刺夷有不從命者先伐之於是羅馬法而斯伊拉克
呼拉商阿爾佩占阿而法失兒灣角兒只諸酋皆以兵
至造浮橋於阿母河以濟師中途大雨雪駐兵於渴石
阿兒哀亦以金織紋幹爾朵進旭烈兀大悅先是怯的
不花使裨將率三千人過阿母河至庫亦斯單攻拔數
堡自將五千人圍吉兒都苦堡築壘掘濠以裨將阿里

守之自引兵攻墨噶林堡又襲破沙噶堡又遣別將分兵攻他勒姆與洛特巴兒兩堡四年吉兒都苦堡人夜襲布里營殺傷甚衆布里戰歿怯的不花聞之亟引還攻拔徒唔及台而舍司兩堡別將沙而班攻拔墨噶林堡明年木剌夷酋阿拉哀丁爲馬三德蘭人哈三所刺殺子兀乃克丁庫沙嗣人咸謂兀乃克丁庫沙使哈三弑其父是年旭烈兀遣烏魯克射姆思哀丁至賽而擔寒堡諭其守將降民不從旭烈兀進至撒瓦及哈瓦甫之地命怯的不花庫喀伊而喀等以兵來會攻庫亦斯單附近諸堡旭烈兀由徒思進至噶爾珊遣貝克帖木

克等諭降庫而沙喝復回軍入木剌夷兀乃克丁庫沙遣其弟蔭恒沙來見又使其異母弟僞爲己子入質以甲士三百人衛送之旭烈兀命兀乃克丁庫沙自來終不至旭烈兀遂分兵三道而進期會師於鹿忒巴耳不花帖木兒將右翼自禡撈答爾進台古塔兒怯的不花將左翼自西模囊進布而嘎脫忽兒向阿剌模忒旭烈兀自將中軍向塔勒耳直至低簾擣其巢穴密殺兀乃克丁庫沙所遣之三百人於可疾甯九月進薄梅門迭思兀乃克丁庫沙之新都也諸將以冬寒馬無芻秣請旋師俟來春再舉不花帖木兒不謂然乃定議礮攻諭

堡民五日出降逾期則屠殺無噍類守者登陴告曰兀乃克丁庫沙不在堡中不得其命不敢降旭烈兀不信命造衝車刻日攻城次日兀乃克丁庫沙始遣使請降已而其弟開城先遁城民大譁復誓以死守兀乃克丁庫沙又遣使白其事旭烈兀以甘言撫之下令亟攻城城民亦發機弩拒之是日風雪兵士皆凍瘕不能仰攻翼日雪霽大軍復乘勢攻之至第四日兀乃克丁庫沙率其子及將吏出降旭烈兀厚撫兀乃克丁庫沙命以手書諭低簾庫母斯諸堡撤守備來降惟阿剌模忒及蘭巴撒耳不下旭烈兀自將攻阿剌模忒裨將貝而該